

**UDRUŽENJE BORACA - MALOLJETNI DOBROVOLJCI ODBRAMBENO-
OSLOBODILAČKOG RATA '92-'95 KANTONA SARAJEVO**

S T A T U T

**UDRUŽENJA BORACA - MALOLJETNI DOBROVOLJCI ODBRAMBENO-
OSLOBODILAČKOG RATA '92-'95 KANTONA SARAJEVO**

Sarajevo, 11.08.2016. godine

Na osnovu Člana 14. i Člana 18. Zakona o udruženjima i fondacijama ("Službene novine FBiH", broj 45/02) i Člana 51. Statuta Udruženja boraca - maloljetni dobrovoljci odbrambeno-oslobodilačkog rata '92 -'95 Kantona Sarajevo., Skupština Udruženja boraca - maloljetnih dobrovoljaca odbrambeno-oslobodilačkog rata '92-'95 Kantona Sarajevo, na sjednici održanoj 11.08.2016. godine donosi:

S T A T U T

**UDRUŽENJA BORACA MALOLJETNI DOBROVOLJCI ODBRAMBENO-
OSLOBODILAČKOG RATA '92-'95 KANTONA SARAJEVO**

I. OPĆE ODREDBE

Član 1.

Ovim statutom se utvrđuje naziv, sjedište i područje djelovanja Udruženja, djelatnost, svrha i programski ciljevi, prava, dužnosti i odgovornosti članova Udruženja, upravljanje, prestanak rada, izvori sredstava i raspolaganje, javnosti rada, donošenje statuta i njegove izmjene i dopune, pečat i zaštitvanje Udruženja.

Član 2.

Udruženje boraca - maloljetni dobrovoljci odbrambeno-oslobodilačkog rata '92 -'95 Kantona Sarajevo upisom u registar Udruženja građana stiče svojstvo pravnog lica.

II. NAZIV, SJEDIŠTE I PODRUČJE DJELOVANJA

Član 3.

Naziv udruženja je: Udruženje boraca - maloljetni dobrovoljci odbrambeno-oslobodilačkog rata '92 - '95 Kantona Sarajevo.

Skraćeni naziv udruženja je: UB-MDR KS

Član 4.

Sjedište Udruženja je Sarajevo, ulica Trg Barcelone br. 2., a sekcije i klubovi Udruženja mogu djelovati i na prostorima na kojima živi veći broj osoba koje su kao maloljetnici služili u oružanim snagama RBiH bez razlike na etničku, vjersku ili drugu pripadnost kao i političko opredjeljenje.
UB-MDR KS će djelovati na području Kantona Sarajevo.

III. DJELATNOST, SVRHA I PROGRAMSKI CILJEVI

Član 5.

Udruženje će vršiti slijedeće djelatnosti:

- Koordinacija programa, istupanja i akcija udruženja i ostvarivanje jedinstvenog stava i nastupanja prema drugim organima, organizacijama i udruženjima.
- Zalaganje za zaštitu temeljnih ljudskih prava i građanskih prava svih bivših pripadnika Armije i MUP-a Republike BiH, a posebno slijedećih kategorija: maloljetnih dobrovoljaca OOR '92 - '95, ratnih vojnih invalida kao i porodica šehida i poginulih maloljetnih pripadnika Armije i MUP-a RBiH.
- Zaštita interesa maloljetnih dobrovoljaca OOR '92 - '95 u društvu.
- Zalaganje za unapređenje općih, socijalnih i drugih egzistencijalnih uvjeta života članova udruženja i njihovih porodica.
- Praćenje i pomoć pri ostvarivanju prava svojih članova, te predlaganje rješenja nadležnim organima i ustanovama koje su od značaja za ostvarivanje prava boračke populacije, kao i davanje inicijativa za osmišljanje i unapređenje djelovanja nadležnih organa i ustanova.
- Razvijanje međusobne saradnje i odnosa sa organima i organizacijama, domaći i međunarodnim organizacijama koje se posredno ili neposredno bave aktivnostima koje mogu pomoći poboljšanju rada i ostvarivanju ciljeva Udruženja, a radi ostvarivanja svestranije i kompletnije pomoći članovima Udruženja i njihovim porodicama
- koordiniranje aktivnosti za racionalnije i prijetnije korištenje raspoloživih sredstava kojima Udruženje raspolaže.

- Razvijati aktivnosti na osiguravanju materijalnih sredstava za razvoj male privrede s ciljem stvaranja pretpostavki za zapošljavanje nezaposlenih članova. kako bi ovisnost o pomoći i donacijama bila što manja.
- Pomoć članovima u obrazovanju,
- Pomoć članovima u rješavanju stambenih problema
- Obavljanje i drugih poslova i zadataka koji nisu obuhvaćeni ovim Statutom, a u skladu su sa Zakonom i ovim Statutom.

Član 6.

Udruženje podstiče i koordinira aktivnosti svojih članova na ostvarivanju zajedničkih i individualnih prava ratnih veterana - maloljetnih dobrovoljaca rata koja proističu iz međunarodnih i domaćih pravnih akata (konvencija, zakona...).

IV. ČLANOVI, PRAVA, DUŽNOSTI I ODGOVORNOSTI

Član 7.

Udruženje sačinjavaju građani/građanke koji imaju svojstvo člana Udruženja, kao i pravna lica koja se učlane. Članovi Udruženja su ravnopravni. Članovi Udruženja učestvuju u radu i aktivnostima Udruženja preko svojih predstavnika i lično, a skladu sa odredbama ovog Statuta .

Član 8.

Za zadovoljenje potreba članova Udruženja, u okviru Udruženja mogu se organizirati klubovi, sekcije za kulturne, zabavne, sportske aktivnosti.

Član 9.

Svaki građanin/građanka – stanovnik/stanovnica sa područja Kantona Sarajevo koji/a je kao maloljetnik/ca pristupio/la u OS RBiH u periodu od 1992-1995 godine, može postati član Udruženja pod sljedećim uslovima:

- da izrazi da postane član Udruženja i da podnese prijavu za prijem u članstvo,
- da prihvati prava, dužnosti i obaveze, utvrđene ovim Statutom i drugim aktima Udruženja,

Društveno-pravna lica sa područja BiH i šire, mogu postati pomažući članovi Udruženja.

Član 10.

Članovi Udruženja ne mogu biti lica:

- kojim je izrečena mjera bezbjednosti zabrane istupanja, dok ta zabrana traje,
- koji svojim ponašanjem mogu da ugroze ugled Udruženja.

Član 11.

Udruženje može imati slijedeće kategorije članova:

1. aktivne,
2. pomažuće i
3. počasne

Član 12.

Aktivni članovi Udruženja su:

1. lica koja aktivno rade u Udruženju,
2. lica koja redovno plaćaju članarinu
3. lica koja imaju svojstvo funkcionera, koja aktivno vrše povjerene dužnosti u organima i radnim tijelima organa upravljanja Udruženjem,
4. lica koja obavljaju stručne i administrativne poslove.

Član 13.

Počasni član Udruženja

Počasni član Udruženja je lice koje Skupština Udruženja proglašava za počasnog člana zbog naročitih zasluga za razvoj Udruženja i sprovođenju ciljeva Udruženja.

Član 14.

Pomažući članovi:

Pomažući članovi Udruženja su lica koja priložima potpomažu rad i aktivnosti u ostvarivanju ciljeva i zadataka Udruženja.

Član 15.

Aktivni članovi Udruženja vrše povjerene funkcije, odnosno poslove i zadatke, po pravilu besplatno.

Pojedinim aktivnim članovima Upravni odbor na osnovu Odluke može odrediti jednokratnu nagradu za njihov poseban doprinos u radu Udruženja.

Član 16.

Stupanje u članstvo je slobodno i vrši se na dobrovoljnoj osnovi.

Za stupanje u članstvo Udruženja podnosi se prijava (pristupnica) na propisanom obrascu i dostavlja uvjerenje od nadležnog organa o vremenu provedenom u OS RBiH.

O prijemu u članstvo odlučuje Predsjednik Udruženja. Odluka o prijemu u članstvo mora se donijeti ako su ispunjeni uslovi za prijem u članstvo. O odluci kojom se vrši prijem ili odbija prijem mora se obavjestiti podnosilac prijave u roku od osam /8/ dana po donošenju odluke.

Primljeni član upisuje se u evidenciju članova i izdaje mu se članska karta.

Članska karta ima značaj isprave kojom se dokazuje svojstvo aktivnog člana Udruženja.

Član 17.

Ako lice nije zadovoljno, odlukom kojom je odbijen njegov prijem u članstvo ima pravo podnošenja prigovora u roku od 15 dana od dana prijema odluke, odnosno obavještenja. Prigovor se podnosi u pismenoj formi Upravnom odboru Udruženja.

Odluka Upravnog odbora po prigovoru je konačna.

Član 18.

Prestanak članstva u Udruženju:

- istupanjem
- brisanjem
- isključenjem

Član 19.

Svaki član Udruženja može slobodno istupiti iz Udruženja. Član Udruženja koji istupa članstva u pismenoj formi obavještava Udruženje o svojoj odluci o istupanju iz Udruženja. Sa odlukom člana Udruženja o istupanju iz članstva upoznaje se Upravni odbor, nakon čega se vrši evidentiranje istupanja.

Član 20.

Isključenje iz članstva vrši Upravni odbor na prijedlog Suda časti/disciplinske komisije Udruženja, a nakon utvrđene istrage o slučaju kada član Udruženja teže povrijedi od ovog Statuta ili ako djeluje protivno ciljevima i interesima Udruženja. Isključenje iz Udruženja, povlači sa sobom i opoziv tog člana sa funkcije koju obnaša nekom od organa Udruženja.

Član 21.

Prigovor protiv odluke o isključenju iz Udruženja podnosi se u pismenoj formi u roku 15 dana od dana prijema odluke o isključenju. O prigovoru odlučuje Skupština Udruženja. Odluka skupštine o prigovoru je konačna.

V. PRAVA, DUŽNOSTI I ODGOVORNOSTI ČLANA

Član 22.

Prava članova Udruženja su:

1. da biraju organe Udruženja i da bude biran u te organe
2. da daju prijedloge, mišljenja i primjedbe za rješavanje određenih pitanja,
3. da učestvuju u radu i aktivnostima Udruženja,
4. da prate rad organa upravljanja i da ukazuje na nedostatke u radu organa upravljanja i da pokreću inicijativu za rješavanje pitanja koja su od interesa za Udruženje,
5. da budu redovno obavješteni o radu Udruženja i njegovih organa,

Član 23.

Dužnosti članova Udruženja su:

1. da učestvuju u aktivnostima Udruženja i u radu organa i radnih tijela Udruženja u koje su birani,
2. da savjesno i odgovorno izvršavaju povjerene poslove i zadatke u vezi sa radom i aktivnostima Udruženja,
3. da redovno izvršavaju preuzete obaveze prema Udruženju i sprovode odluke, stavove i zaključke organa Udruženja.

Član 24.

Odgovornost članova Udruženja su:

1. javna kritika za neizvršenje svojih dužnosti kojim nije narušen ugled Udruženja ili nanesena materijalna šteta.
2. Opomena pred isključenje, za neizvršenje svojih dužnosti i obaveza dva i više puta uzastopno,
3. Isključenje, kad član teže povrijedi odredbe ovog Statuta ili ako djeluje protivno ciljevima i interesima Udruženja.

VI. ORGANI UPRAVLJANJA

Član 25.

Organi Udruženja:

1. Skupština Udruženja,
2. Upravni odbor,
3. Sud časti (disciplinska komisija).

Član 26.

Skupština Udruženja:

Skupština je najviši organ upravljanja Udruženja. Skupštinu Udruženja sačinjavaju svi aktivni članovi Udruženja.

U radu Skupštine, u svojstvu gosta, bez prava glasa i odlučivanja mogu prisustvovati i

predstavnicima društveno-pravnih lica, državnih organa i institucija i ostala pozvana fizička lica.

Član 27.

Skupština radi u sjednicama.
Sjednice Skupštine održavaju se prema potrebi, a najmanje jednom godišnje.
Izborna sjednica Skupštine održava se svake četvrte godine.

Skupština Udruženja ima predsjednika Skupštine.
Predsjednika Skupštine Udruženja biraju članovi Skupštine javnim glasanjem.
Smatra se da je izabran na dužnost Predsjednika Skupštine Udruženja kandidat koji dobije nadpolovičnu većinu glasova prisutnih članova Skupštine.
Skupštinu saziva i njom predsjeda predsjednik Skupštine.
Skupštinu je dužan sazvati Predsjednik Skupštine na zahtjev jedne trećine aktivnih članova ili na zahtjev nadležnog organa koji vrši nadzor nad radom Udruženja.
Ukoliko Predsjednik Skupštine ne sazove sjednicu u roku od trideset dana od prijema zahtjeva, sjednicu će sazvati predlagач po ustaljenom postupku.

Član 28.

Radom Sjednice Skupštine rukovodi predsjednik i dopredsjednici Skupštine koje bira Skupština iz reda članova Udruženja.

Članovi Udruženja protiv kojih se vodi krivični postupak ili su za isti osuđeni, osim za djela iz ZOBS i ZONDINOIM, ne mogu obnašati funkciju predsjednika ili dopredsjednika Skupštine Udruženja.

Predsjednika i dva dopredsjednika Skupštine bira Skupština na period od (4) četiri godine.
Skupština bira zapisničara.

O radu Skupštine vodi se zapisnik.
Zapisnik sa sjednice Skupštine potpisuje predsjednik Skupštine i zapisničar.

Član 29.

Skupština može donijeti Poslovnik kojim se bliže regulira način rada Skupštine i odlučivanja, donošenje zaključaka na sjednicama.

Sjednica Skupštine može se održati i punovažno odlučivati ako istoj prisustvuje nadpolovična većina ukupnog broja članova Skupštine, a odluke i zaključke donosi nadpolovičnom većinom prisutnih članova javnim izjašnjavanjem na Skupštini. ukoliko Statutom nije predviđeno da se za donošenje određenih akata traži kvalifikovana većina.

Člana Skupštine koji nije prisutan na Skupštini, može u glasanju zastupati drugi član Skupštine udruženja, ukoliko za to ima pismenu punomoć koju je prije početka Skupštine dostavio Predsjedniku Skupštine.

Glasanje na sjednici je javno, ako Skupština ne odluči drugačije.

Član 30.

Skupština u svojoj nadležnosti:

1. Donosi Statut Udruženja i odlučuje o njegovim izmjenama i dopunama,
2. Donosi opća akta Udruženja i po potrebi poslovnik o radu Skupštine,
3. Donosi program rada za mandatni period i godišnji plan rada, finansijski plan i završni račun Udruženja,
4. Razmatra i usvaja izvještaje o radu Upravnog odbora i Suda časti između dvije Skupštine Udruženja,
5. Odlučuje o prestanku rada Udruženja,
6. Vrš i izbor predsjednika i podpredsjednika Skupštine, te članove Upravnog odbora i Suda časti i odlučuje o njihovom razrješavanju,
7. Imenuje i razrješava ovlaštena lica za zastupanje i predstavljanje Udruženja.
8. Odlučuje o izboru počasnih članova Udruženja i vrši proglašavanje,
9. Odlučuje o prigovorima i žalbama izjavljenim protiv odluka Upravnog odbora, kao i molbama članova upućenih Skupštini,
10. Odlučuje o osnivanju klubova i sekcija, ogranak a i drugih oblika djelovanja Udruženja,
11. Daje tumačenje odredbi ovog Statuta,
12. Vrš i druge poslove u vezi sa radom Udruženja utvrđene zakonima i ovim Statutom.

Član 31.

Skupština vrši sve funkcije organa upravljanja Udruženja, ako vršenje pojedinih funkcija nije povjereno Upravnom odboru Udruženja.

Član 32.

Upravni odbor:

Upravni odbor je izvršni organ Skupštine Udruženja, kojeg bira Skupština sa mandatom od četiri godine.

Predsjednika i dopredsjednika Upravnog odbora Udruženja bira Skupština iz redova članova Upravnog odbora.

Član Upravnog odbora Udruženja protiv kojeg se vodi krivični postupak ili je za isti osuđen osim za djela iz ZOBS i ZONDINOIM ne može obnašati funkciju predsjednika ili dopredsjednika Upravnog odbora.

Pojedinom članu ili cijelom Upravnom odboru mandat od četiri godine može biti kraći kada to Skupština Udruženja odluči.
Upravni odbor broji 9 članova.

Svaki član upravnog odbora predstavlja po jednu Općinu sa područja djelovanja Udruženja.

Član Upravnog Odbora mora imati mjesto prebivališta na Općini koju predstavlja.

U slučaju promjene mjesta/Općine boravka član upravnog odbora nastavlja da obnaša funkciju predstavnika te Općine sve do kraja mandata.

Za svoj rad Upravni odbor je odgovoran Skupštini Udruženja.

Član 33.

Upravni odbor radi i odlučuje u sjednici.

Sjednice Upravnog odbora održavaju se prema programu i planu, ali najmanje jedanput tri mjeseca.

Sjednice Upravnog odbora saziva Predsjednik, a u slučaju njegove odsutnosti dopredsjednik, na zahtjev nadpolovične većine članova Upravnog odbora.

Sjednica Upravnog odbora može se održati kad sjednici prisustvuje 2/3-ćinska većina njegovih članova, a odluke i zaključci se donose većinom glasova ukupnog broja prisutnih članova Upravnog odbora.

U radu sjednice Upravnog odbora mogu, učestvovati predstavnici zainteresovanih pravnih i fizičkih lica, zatim sredstva javnog informisanja i državnih organa, bez prava odlučivanja.

Na sjednici se vodi zapisnik. Zapisnik vodi Sekretar Udruženja ili lice koje izabere Upravni odbor. Zapisnik potpisuju predsjednik Upravnog odbora i zapisničar.

Član 34.

Poziv za sjednicu Upravnog odbora dostavlja se svim članovima najmanje 7 dana prije održavanja, a samo u izuzetnim slučajevima u kraćem roku.

Poziv sadrži prijedlog dnevnog reda, oznaku mjesta i vrijeme održavanja sjednice.

Ukoliko to mogućnosti dozvoljavaju uz poziv se dostavlja radni materijal po pitanjima o kojima će se voditi rasprava i odlučivati na sjednici.

Član 35.

Upravni odbor u svojoj nadležnosti:

1. radi na ostvarivanju ciljeva i zadataka Udruženja, odluka, zaključaka, stavova i smjernica skupštine Udruženja,
2. daje inicijativu za izmjene i dopune Statuta i za donošenje drugih općih akata koje donosi Skupština i utvrđuje prijedlog tih akata,
3. utvrđuje prijedlog programa i planova rada, prijedlog finansijskog plana i završni račun i usvaja periodične obračune,
4. priprema izvještaje o svom radu i podnosi ih Skupštini na razmatranje i usvajanje.
5. utvrđuje poslovnu politiku u vezi sa radom Udruženja i upravlja sa imovinom Udruženja,
6. odlučuje o prijemu u članstvo udruženja
7. utvrđuje prijedlog za izbor članova u organe Udruženja, koje bira Skupština i vrši izbor svojih predstavnika u druge organe u organizacije koje to traže,
8. stara se o pravilnom korištenju imovine Udruženja, o urednom obavljanju materijalno-finansijskog poslovanja i stručnom i blagovremenom vršenju stručnih i administrativnih poslova.
9. upoznaje nadležne organe o radu i problemima Udruženja i daje prijedloge za njihovo rješavanje,
10. utvrđuje koja se dokumenta i podaci smatraju službenom ili drugom tajnom.
11. odlučuje o pohvalama i nagradama zaslužnih članova
12. vrši i druge poslove i zadatke koji Statutom nisu i izričitoj nadležnosti Skupštine.

Član 36.

Za obavljanje povremenih poslova ili privremenih poslova, Upravni odbor može formirati posebne komisije.

Član 37.

Sud časti (disciplinska komisija)

Sud časti je samostalni organ kojeg bira Skupština Udruženja u sastavu od tri člana i mandatom od četiri godine iz redova članova Udruženja

Član Udruženja protiv kojeg se vodi krivični postupak ili je za isti osuđen osim za djela iz ZOBS i ZONDINOIM ne može obnašati funkciju člana Suda časti.

U opravdanom slučaju Skupština Udruženja može odlučiti da pojedinom članu Suda časti mandat prestane i prije isteka roka od četiri godine.

Na mjesto opozvanog člana Suda časti bira se novi član čiji mandat traje koliko i mandat ostalih članova tog saziva.

Član 38.

Sud časti radi u sjednicama i odlučuje o sporovima koji nastaju iz izvršenja poslova obaveza članova utvrđenim Statutom i općim aktima Udruženja.

Nezadovoljni član u sporu, odlukom Suda časti, ima pravo žalbe Skupštini Udruženja u roku od trideset dana po prijemu zaključaka Suda časti, čija je odluka konačna.

VII. UVJETI I POSTUPAK ZA PRIPAJANJE, RAZDVAJANJE ILI TRANSFORMACIJU UDRUŽENJA

Član 39.

Udruženje se može udruživati:

- u Savez udruženja koja se bave istom problematikom
- sa drugim udruženjima i nevladinim organizacijama koji imaju iste ili slične ciljeve.

Udruženje se može pripojiti drugom udruženju, ili drugoj nevladinoj organizaciji, može se razdvojiti na dva ili više udruženja, i može se transformisati u drugi oblik, o čemu Skupština Udruženja donosi odluku u kojoj će regulisati šta sa imovinom za slučaj nastanka navedenih promjena.

Član 40.

Udruženje može biti član raznih NVO mreža, asocijacija od lokalnog do međunarodnog nivoa,

Odluku o uclanjenju iz prethodnog stava donosi Upravni odbor Udruženja.

Član 41.

Odluku o pripajanju, razdvajanju ili transformaciji donosi Skupština Udruženja 2/3 većinom glasova prisutnih članova.

VIII. PRESTANAK RADA UDRUŽENJA

Član 42.

Udruženje prestaje sa radom i slijedećim slučajevima:

1. kada to na bazi sopstvene analize odluči Skupština Udruženja dvotrećinskom većinom prisutnih članova Udruženja,
2. kada mu nadležni organ u skladu sa zakonom zabrani rad.

Član 43.

Kada Udruženje prestane sa radom imovina se raspoređuje:

1. na izmirivanje zakonskih i ugovornih obaveza,
2. povrat društveno pravnim licima, preduzećima, srazmjerno njihovom doprinosu u stvaranju imovine Udruženja,
3. raspodjela članovima srazmjerno njihovom radu i doprinosu u stvaranju imovine Udruženja.

IX. IZVORI SREDSTAVA I RASPOLAGANJE

Član 44.

Za ostvarivanje ciljeva i zadataka Udruženja a čiji su zadaci utvrđeni Zakonom, drugim propisima i ovim Statutom, sredstva se obezbjeđuju:

- od priloga članova, društveno pravnih lica i državnih organa,
- iz donacija i pomoći domaćih i međunarodnih organizacija,
- iz drugih izvora u skladu sa zakonom.

Član 45.

Sredstva Udruženja se utvrđuju i raspoređuju finansijskim planom za svaku godinu. Na kraju godine sastavlja se završni račun sa analitičkim pregledom izvora prihoda i rashoda.

Član 46.

Udruženje može osnivati privredne subjekte u skladu sa zakonom.

Član 47.

Imovina Udruženja sastoji se od stalnih i obrtnih sredstava. Sva javna Udruženja mora biti evidentirana u skladu sa zakonskim propisima koji regulišu ovu materiju. Sredstva se koriste na način utvrđen Zakonom i ovim Statutom. Ukoliko se ukaže potreba za posebnim uređenjem ove oblasti, Upravni odbor Udruženja može donijeti "Pravilnik o finansijsko-materijalnom poslovanju".

Član 48.

Finansijsko - materijalno poslovanje podliježe kontroli ovlaštenog državnog organa i kontroli društveno pravnih lica u dijelu namjenski dodjeljenih sredstava Udruženja.

X. NAČIN DONOŠENJA FINANSIJSKOG IZVJEŠTAJA I IZVJEŠTAJA O RADU UDRUŽENJA

Član 49.

Upravni odbor Udruženja donosi na kraju kalendarske godine Izvještaj o radu Udruženja i Finansijski izvještaj te iste podnosi Skupštini Udruženja na razmatranje i usvajanje.

Izvještaji se smatraju usvojenim kada se za njih izjasni najmanje 2/3 prisutnih članova na Skupštini Udruženja.

Ukoliko se isti ne usvoji vratiti će se Upravnom odboru na doradu, i prezentovat će se na prvoj sljedećoj sjednici Skupštine Udruženja.

XI. JAVNOST RADA UDRUŽENJA I NJEGOVIH ORGANA

Član 50.

Rad i poslovanje Udruga i njegovih organa su javni i dostupni članovima Udruga i ostalim zainteresiranim organima i organizacijama. Udruga je dužno poštovati princip transparentnosti u radu i poslovanju, te u skladu sa zakonom i ovim Statutom, učiniti potrebne podatke i informacije o radu dostupnim medijima i javnosti.

Članovi Udruga i ostali upoznaju se o izvorima prihoda i finansijskom poslovanju putem pisanih izvještaja i periodičnih obračuna koji se dostavljaju Poreznoj Upravi FBiH.

XII. DONOŠENJE STATUTA, IZMJENE I DOPUNE STATUTA

Član 51.

Statut i njegove dopune i izmjene donosi Skupština Udruga, dvotrećinskom većinom prisutnih članova na sjednici Skupštine.

Član 52.

Prijedloge za izmjenu i dopunu statuta podnosi Upravni odbor Udruga. Inicijativu za izmjene i dopune Statuta može pokrenuti svaki član Udruga, dostavljajući prijedlog Upravnom odboru u roku od 60 dana prije održavanja sjednice Skupštine. Upravni odbor odlučuje o inicijativi za izmjene i dopune Statuta i dužan je o svojoj odluci podnijeti izvještaj na prvoj sjednici Skupštine.

Član 53.

Izmjene i dopune Statuta se vrše na način i utvrđeni postupak za donošenje Statuta.

Član 54.

Izmjene i dopune Statuta stupaju na snagu danom donošenja.

XIII. PEČAT I ŠTAMBILJ UDRUŽENJA

Član 55.

Udruženje ima svoj pečat.

Pečat Udruženja je okruglog oblika sa prečnikom 40 mm u koncentričnom krugu ispisan je tekst latinicom: "Udruženje boraca - maloljetni dobrovoljci odbrambeno-oslobodilačkog rata '92 - '95 Kantona Sarajeva". Između prvog i zadnjeg slova teksta nalazi se znak u obliku "Ijijana".

U sredini pečata se nalazi logo kojeg čine dva ukrštena mača između kojih se nalazi štit koji na svojoj lijevoj polovini ima 3 Ijijana dok na desnoj polovini štita stoji broj "18"

XIV. ZASTUPANJE I PREDSTAVLJANJE

Član 56.

Predsjednik Skupštine i predsjednik Upravnog odbora zastupaju i predstavljaju udruženje, te iznose ocjene i stavove organa Udruženja o svim važnijim pitanjima politike i prakse Udruženja.

Predsjednik Skupštine potpisuje akta koja donosi Skupština i odgovara za njihovu realizaciju.

Predsjednik Upravnog odbora potpisuje akta koja donosi Upravni odbor i odgovara za njihovu realizaciju.

Predsjednik Skupštine i Predsjednik Upravnog odbora čuvaju pečat Udruženja i njima rukuju i potpisuju akta interne i eksterne korespondencije Udruženja.

Član 57.

Skupština Udruženja imenuje i razrješava ovlaštena lica za zastupanje i predstavljanje Udruženja.

Mandat lica za zastupanje i predstavljanje Udruženja traje 4 godine, sa pravom reizbora.

Broj uzastopnih mandata lica za zastupanje i predstavljanje nije ograničen.

Član 58.

Predsjednika Skupštine u slučaju njegove odsutnosti ili privremene spriječenosti za rad zamjenjuje jedan od dva dopredsjednika, sa svim pravima i ovlaštenjima Predsjednika. Predsjednika Upravnog odbora u slučaju njegove odsutnosti ili privremene spriječenosti za rad zamjenjuje podpredsjednik, sa svim pravima i ovlaštenjima Predsjednika.

Član 59.

Sekretar Udruženja brine se o prijemu, evidentiranju i čuvanju arhivske gradje. U zajednici sa predsjednikom stara se o realizaciji programskih i planskih zadataka, sprovođenju odluka i zaključaka Skupštine i Upravnog odbora i općih akata Udruženja.

Član 60.

Sekretar Udruženja neposredno rukovodi radom Stručne službe Udruženja i odgovoran je za blagovremen, pravilan i zakonit rad Stručne službe.

XV. STRUČNA SLUŽBA

Član 61.

Radi obavljanja stručnih, organizacionih, plansko analitičkih administrativno finansijskih, čuvanja i održavanja imovine Udruženja i drugih poslova Udruženje obrazuje stručnu službu. Prava, dužnosti i ovlaštenja radnika Stručne službe utvrđuje se aktom o njenom osnivanju. Na stručnu službu se ne mogu prenositi ovlaštenja Skupštine i Upravnog odbora. Broj radnika Stručne službe, njihove kvalifikacije, opis poslova i zadataka, utvrđuje se posebnim aktom koji donosi Skupština. Sredstva za rad Stručne službe obezbjeđuje Skupština Udruženja iz ukupnih prihoda Udruženja.

XVI. PRELAZNE I ZAVRŠNE ODREDBE

Član 62.

Statut stupa na snagu danom donošenja.

Stupanjem na snagu ovog Statuta, prestaje da važi Statut Udruženja boraca - maloljetni dobrovoljci odbrambeno-oslobodilačkog rata '92 - '95 Kantona Sarajevo od 08.11.2016. godine, evidentiran kod Ministarstva pravde i uprave pod brojem: 03-05-05-12944/11, sa datumom ovjere 22.11.2011. godine.

Član 63.

Tumačenje odredbi ovog Statuta vrši Skupština Udruženja.

Broj:1-8/2016

Sarajevo, 11.08.2016. godine
Predsjednik Skupštine

Kemal Šalaka



OVJERA: MINISTARSTVO PRAVDE I UPRAVE
KANTON SARAJEVO

Broj: 03-03-05-10279/16
Sarajevo, 18. 11. 2016. god.
(datum)

MINISTAR

